

Faktor luar pengaruhi ringgit

Gabenor jelaskan prestasi ringgit ketika ini tidak cerminkan prospek positif ekonomi Malaysia

Oleh NURHIDAYAH HAIROM
SHAH ALAM

Prestasi semasa ringgit dipengaruhi oleh faktor luaran sama seperti mata wang serantau lain. Gabenor Bank Negara, Datuk Abdul Rasheed Ghaffour berkata, beberapa faktor ini termasuk pelarasan pasaran kepada perubahan jangkaan kadar faedah Amerika Syarikat (AS), kebimbangan geopolitik dan ketidakpastian sekitar prospek ekonomi China.

"Prestasi ringgit ketika ini tidak mencerminkan prospek positif ekonomi Malaysia pada masa hadapan dan diyakini terus meningkat dalam tahun ini," katanya dalam satu kenyataan pada Selasa.

Beliau mengulas mengenai mata wang tempatan yang terus merekodkan prestasi lemah berbanding dolar AS setakat ini.

Mengulas lanjut, Abdul Rasheed berkata, pertumbuhan pada 2024 akan di dorong oleh peningkatan dalam permintaan luar dan perbelanjaan domestik yang kukuh.

"Sektor pelancongan telah pulih dengan kukuh dan kedatangan pelancong pada 2024 dijangka melebihi paras pra-pandemik

sebanyak 26 juta.

"Ramalan Tabung Kewangan Antarabangsa (IMF) terkini ialah perdagangan global bertambah baik daripada 0.4 peratus pada 2023 kepada 3.3 peratus pada 2024.

"Bagi Malaysia, eksport menunjukkan penambahanbaikan yang stabil sejak suku keempat 2023. Malah, pada Januari, eksport telah bertukar positif (8.7 peratus)," katanya.

Beliau berkata, momentum pelaburan meningkat dengan pelaksanaan projek yang diluluskan baik di sektor swasta mahupun awam.

"Perkembangan positif ini mencerminkan komitmen kerajaan untuk melaksanakan pembaharuan struktur dan jangkaan penurunan kadar faedah secara lebih awal ekonomi."

"Kebanyakan penganalisis meramalkan nilai ringgit meningkat tahun ini," katanya.

Sebelum ini, Perdana Menteri, Datuk Seri Anwar Ibrahim ketika ditanya mengenai prestasi ringgit menyerahkan kepada gabenor untuk menjawab isu berkenaan.

"(Mengenai prestasi) ringgit, gabenor (Abdul Rasheed) ada di sini. Dia dah janji nak jawab," katanya ringkas pada Selasa.

Terdahulu mata wang tempatan merekodkan prestasi lemah setakat jam 9 pagi Selasa dengan ringgit berkurangan kepada 4.787/7930 berbanding dolar AS daripada 4.785/7890 semasa ditutup pada Isnin.

Kali terakhir paras ringgit terendah dicatatkan pada 1998 apabila krisis kewangan Asia menjelaskan mata wang serantau dengan RM4.885 setiap dolar AS.



ABDUL RASHEED